



**FA'AMATALAGA O FUAFUAGA MO TUPE A LE MALO
TALA O LE TUPE 2018/19**

MATĀGALUEGA O TUPE

ME 2018

FA'ASOLOGA O MATĀUPU

I. AIAIGA MO LE SAUNIA O LIPOTI	3
II. ILOILOGA O LE TULAGA O TUPE A LE MALO MA LE TAMAOAIGA, 2012/13 I LE 2016/17.....	3
III. SINI AUTU MO LE TAMAOAIGA.....	9
IV. VA'AIGA I LE LUMANA'I I LE TAMAOAIGA MA TUPE FA'AALU A LE MALO	11
V. FUAFUAGA ALUALU MAMAO AUA LE TU'UITIITIA O AITALAFU A LE MALO.....	13

FA'AMATALAGA O FUAFUAGA MO TUPE A LE MALO TALA O LE TUPE 2018/19

I. AIAIGA MO LE SAUNIA O LIPOTI

O lo'o manino lelei i le Tulafono mo le Pulea o Tupe a le Malo 2001 ta'iala mo le pulea lelei o tupe a le Malo, ma fa'ata'atitia mai ai aiaiga mo le saunia o lipoti a le Minisita o Tupe ma le Matagaluega o Tupe. O le vaega 18 o lo'o manino mai ai vaega nei: Saunoaga autu o le tala o le tupe, ma se Fa'amatalaga i se ata fa'ata'ita'i o tupe maua ma tupe fa'aalu mo le tausaga fa'aletupe ua maea fuafuaina, fa'aopoopo iai ma isi tausaga e lua o lumana'i, po'o Fuafuaga Tu'utu'u mamao. O le vaega 19, o lo'o aiaia ai le saunia o se Fa'amatalaga o Fuafuaga mo Tupe, e tu'uina atu fa'atasi ma le Saunoaga o le tala o le tupe i le Palemene.

O le Fa'amatalaga o Fuafuaga mo Tupe e aofia ai se auiliiliga, ina ia manino le feso'ota'i ai o Fa'amatalaga o le Tala o le Tupe ma le Ta'iala mo le Atina'e o Samoa (TAS). O lea, e mana'omia ai le tu'uina mai o ni fa'amatalaga e auiliili ai ni eseese o ia Ta'iala pe afai e iai ni fesuiaiga o le tamaoaiga ma tulaga tau tupe a le Malo ma Ta'iala ua maea fa'ata'atia i le TAS.

O le manulauti o le TAS 2016/17-2019/20 mo le isi fa tausaga o le *"U'una'ia Atina'e ma Fa'atupula'ia Avanoa mo Tagata Uma"*.

II. ILOILOGA O LE TULAGA O TUPE A LE MALO MA LE TAMAOAIGA, 2012/13 I LE 2016/17

Ata Fa'atatau o le Tamaoaiga

I le tausaga fa'aletupe (TF) 2012/13, na fa'amauina ai le pa'u i le tamaoaiga o le atunuu i le 1.9 pasene ona o aafiaga o le afa o Eveni ia Tesema 2012. Ae peita'i, sa va'aia le si'itia i le tamaoaiga i le TF2013/14 i le 1.2 pasene ona o galuega fa'aleleia mo vaega sa aafia i le afa o Eveni, tapenapenaga mo le Fonotaga a atunuu laiti tauatia'e a le lalolagi ma le fausiaina o faletalimalo e pei o le Return to Paradise Resort, Taumeasina Island Resort, Sheraton Samoa Aggie Greys Hotel ma le Samoa Aggie Greys Hotel and Bugalows.


Na toe va'aia le si'itia o le tamaoaiga i le TF2014/15 i le 1.6 pasene ma o lenei tulaga na u'una'ia malosi e vaega nei: galuega fa'aleleia mo vaega sa aafia i le afa o Eveni, tapenapenaga mo le fonotaga a atunuu laiti tauatia'e o le lalolagi, tapenapenaga mo Ta'aloga a Tupulaga Talavou a Malo o le Taupulega, fa'apea foi ma tapenapenaga mo le talimalo o le atunuu i le ta'aloga a le All Blacks ma le

Manu Samoa. O nei vaega uma na fesoasoani i le si'itiaga o le tamaoaiga mo lea vaitau aemaise mo vaega tau i tagata tafafao maimoa mai fafo, pisinisi, femalagaiga, feso'ota'iga, eletise ma le suavai.

I le TF2015/16, na maualuga le si'itiaga i le tamaoaiga i le 7.1 pasene. O le mafua'aga taua mo lea si'itiaga o le si'itia i le fuainumera o i'a fa'atauina atu i fafo ina ua fa'atūina se pisinisi i totonu o Samoa e ta'ua o le Apia Deep Sea Fishing Ltd. Sa fesoasoani foi ni isi vaega i lea si'itiaga e pei o le tatalaina o faletalimalō o le Sheraton Samoa Aggie Greys Hotel ma le Taumeasina Island Resort fa'apea foi le fa'aauauina pea ona faia ni isi o atina'e tetele a le Malo (Atina'e telele mo le toe fa'aleleia o le malae va'alele, fa'aleleia o auala, fausiaina o le uafu ma isi atina'e) o lo'o iai le latou sao i le si'itiaga i le tamaoaiga.

Sa va'aia le toe foi o le tamaoaiga i le tulaga masani ina ua fa'amauina le si'itia maualalo i le 2.5 pasene i le TF2016/17. O lea tulaga na mafua mai i le mae'a ai o polokalame mo le galuega toe fa'aleleia i le maea ai o le afā fa'atasi ai ma ni isi atina'e tetele na fa'amae'aina fa'apea foi ma le pa'ū i vaega ma'oti o Faigafaiva, Faletalimalō ma Faleaiga.

O le Ata 1 o lo'o i lalo o lo'o fa'aailoa atu ai tulaga o le tamaoaiga i tausaga fa'aletupe e lima ua tuana'i.




Fa'amatalaga: Matagaluega o Tupe ma le Ofisa o Fuainumera

Tau o le Soifuaga

O lo'o fa'aali atu i le ata 2 i lalo, le tulaga i le tau o le soifuaga mai le TF2012/13 i le TF2016/17. O lo'o maitauina le fa'atūmauina pea o le maualalo o le tau o le soifuaga i lona fua fa'atatau e 3.0 i le 4.0 pasene i le lima tausaga ua tuana'i.

O le pa'ū ai o le tau o meataumafa ma le suā'u i le lalolagi i le TF2012/13 na mafua ai ona pa'ū maualalo le tau o le soifuaga e tusa lea ma le 0.2 pasene lea na aafia ai ma le tau o meataumafa, o meainu suamalie, o vaega tau i fale, o le suavai, eletise, kesi ma isi oloa tau suā'u. E taufai tutusa lava lea aafiaga ma le tulaga sa fa'amauiina i le TF2013/14 lea na pa'ū maualalo ai le tau o le soifuaga e tusa lea ma le 1.2 pasene ona o le fa'aauau ai pea o le pa'ū o le tau o le suā'u i le lalolagi.


Sa maitauina le si'itia ai o le tau o le soifuaga i le TF2014/15 e tusa lea ma le 1.9 pasene e afua mai i le si'itia ai o le tau o oloa tau soifua maloloina, o fale'aiga, faletalimalō, ma oloa tau lavalava ma seevae. I le TF2015/16 sa maitauina ai le alu i lalo o le tau o le soifuaga e tusa lea ma le 0.1 pasene ona si'itia ai lea e tusa lea ma le 1.3 pasene i le TF2016/17 ona o le alu i le luga o le tau o le suā'u i le lalolagi.



Fa'amatalaga: Matagaluega o Tupe ma le Faletupe Tūtonu o Samoa

Paleni o Tala o le Tupe


Sa fa'amauiina le lelei o le tulaga i le mataituina o le paleni o tupe a le Malo i le lima tausaga ua tuanai, o lo'o atagia mai i le si'itia o le pa'ū maualalo o le paleni o tupe mai le 3.8 pasene i le 0.4 pasene mai le TF 2012/13 aga'i atu i le TF2015/16. Ua ausia lea tulaga ona o le lalagaina fa'a-fafine to'aga e le Malo o ana tupe fa'aalu aemaise o le fa'amae'aina ai o galuega fa'aleleia i le maea ai o le mala fa'alenua. O le si'itia ai o le pa'ū maualalo i le 1.1 pasene i totonu o le TF2016/17, ona o le fa'atinoga o galuega o atina'e tetele fou a le Malo.



Fa'amatalaga: Matagaluega o Tupe ma le Ofisa o Fuainumera

Tupe Maua ma Tupe Fa'ameaalofa.


Ua si'itia tupe maua mai i **Lafoga Maua** mai le 22.1 pasene i le 24.2 pasene o le Tamaoiga mai le TF2012/13 i le TF2015/16. Ae, i le TF2016/17 na si'itia ai i le 24.3 pasene. Sa maualuga foi le si'itia o **Tupe Fa'ameaalofa** mai i fafo i le 4.4 pasene i le TF2013/14 ona o fesoasoani mai pa'aga mai fafo aua galuega toe fa'aleleia i le mae'a ai o le afā mo le isi tolu tausaga. A ua toe fa'aitiitia i le 2.1 pasene mo le TF2014/15, fa'apea le TF2015/16 i le 2.2 pasene ma le TF2016/17 i le 1.9 pasene. O **Tupe Maua mai isi auala** sa si'itia mo le tolu tausaga mai i le TF2012/13 i le TF2014/15 peitai o le TF2015/16 sa leai se suiga se ia oo mai le TF2016/17 ua toe si'itia ai i le 2.8 pasene o le Tamaoiga. O lo'o fa'amauina se pa'ū maualalo o le faitau aofai o **Tupe Maua ma Tupe Fa'ameaalofa** i le TF2014/15 ona ua mae'a Tupe fa'ameaalofa mai fafo mo le afā o Eveni sa fa'amatu'u mai i le TF2013/14 (fa'amatala atili i le Ata 4).



Fa'amatalaga: Matagaluega o Tupe ma le Ofisa o Fuainumera

Tupe Fa'aalu


O **Tupe fa'aalu mo Galuega Fa'atino** i le pasene o le tamaoaiga, sa maitauina le fa'aitiitia mai le TF2013/14 e o'o i le TF2016/17. O leni pa'ū na mafua mai i le fa'atinoina e le Malo o le alafua e 10 pasene e u'una'ia ai le fa'asoasoa tatau o tupe fa'aalu a Matagaluega ma Fa'alapotopotoga, fa'atasi ai ma le 3 pasene mo le vaega tau i a'oa'oga ma le soifua maloloina. I le tulaga o **Tupe Fa'aalu mo Atina'e**, o lo'o maitauina ai se si'itaga la'itiiti mai le TF2014/15 i le TF2016/17 e pei ona fa'ailoa mai i le Ata 5 o lo'o i lalo. O lea si'itaga na mafua mai i atina'e tetele a le Malo e aofia ai le polokalame o galuega toe fa'aleleia ona o le afā fa'atasi ai ma le fa'aauuina o atina'e mo felaua'iga i le Ea, o le Maota fonofono a le Palemene, o le fausiaina o le aualasimā i Leonē, o isi atina'e tau i felaua'iga ma le falepuipui fou. O atina'e tetele nei a le Malo o lo'o telē lo latou sao i le si'itia ai o le **Aofaiga o Tupe Fa'aalu** mo le TF2016/17.



Fa'amatalaga: Matagaluega o Tupe ma le Ofisa o Fuainumera

Tupe Fa'aagaga i Fafu

O lo'o ua maitauina le tumau pea o le malosi o tupe fa'aagaga i le tapulaa o le 4 i le 5 masina i le lima tausaga ua tuana'i. O lea tulaga e afua mai lea i le si'itia ai o tulaga i tupe fa'ameaalofa fa'apea ma nonogātupe o lo'o iai fa'amāmā avega e fesoasoani lea i galuega toe fa'aleleia o le afā o Eveni fa'atasi ai ma atina'e aua le talimalō ai o Samoa i le fonotaga a atunu'u laiti tauatina'e o le lalolagi i le 2014. Sa fa'amauina le pa'ū i le 4.2 masina le malosi o tupe fa'aagaga i le TF2015/16 ma toe si'itia laitiiti ai i le 4.8 masina i le TF2016/17 ina ua mae'a ni isi o atina'e, fonotaga tetele ma ta'alogā fa'avaomalo.



Fa'amatalaga: Matāgaluega o Tupe ma le Faletupe Tūtotonu o Samoa

Nonōgātupe a le Malo

Na fa'amauina le fa'aitiitia o le pasene o tauaofa'i o nonōgātupe a le Malo i le Tamaoaiga i le 49 pasene i le TF2016/17, i lalo ifo . Ua mafua lea tulaga ona o ni isi o atina'e tetele a le Malo ua tauafa'ai'ui'u e pei o galuega fa'atino i le poloketi o le SACEP ma poloketi i le Vaega Maoti o le Soifua Maloloina fa'atasi ai ma le fa'aaauuina pea o le mata'ituina e le Malo o ana nonōgātupe. I tausaga i tua atu o le TF2016/17, sa silia atu le pasene o nonōgātupe i le tamaoaiga, ona o ni isi o nonōgātupe fou i le 2014 mo galuega toe fa'aleleia o le Malae Va'alele fa'atasi ai ma ni isi o nonōgātupe fesoasoani e iai fa'amāmā avega mo galuega toe fa'aleleia i le mae'a ai o le afā o Eveni. O le pasene o tupe totogi mo nonōgātupe sa faamauina i lalo o le 3 pasene mai le TF2012/13 i le TF2014/15, ae peitai, sa silia ma le tapulaa o le 3 pasene i le TF2015/16 ma le TF2016/17 ona o faaunegatupe ua amata ona toe totogi.

Pusa 1: Nonōgātupe a le Malo

Tausaga	2012/13	2013/14	2014/15	2015/16	2016/17
Nonōgātupe a le Malo (miliona tālā)	990.4	1,015.5	1,126	1,080	1,047
Pasene (%) o nonōgātupe a le Malo i le Tamaoaiga (Tapulaa: Ia lalo ifo 50%)	54	54	58	53	49

Tausaga	2012/13	2013/14	2014/15	2015/16	2016/17
Aofa'iga e totogi mo nonogātupe (milionā tālā)	38.8	46.2	53.9	66.5	66.6
Pasene (%) o Aofa'iga e totogi mo nonogātupe i le tamaoaiga (Tapulaa: 2%-3%)	2.1	2.5	2.8	3.2	3.1

Fa'amatalaga: Matāgaluega o Tupe

III. SINI AUTU MO LE TAMAOAIGA

Faiga Fa'avae Tau Tupe a le Malo

O faiga fa'avae ina ia mautinoa le mausalī ai o le tamaoaiga mo le lumana'i, o le a fa'aaauaina pea e le Malo le tauaveina o tapula'a o lo'o fa'ailoa atu i lalo:

- a) Ia i le va o le 35 – 38 pasene o le tamaoaiga le aofa'i o tupe fa'aalu masani mo auunaga, ina ia lava seleni e fa'asaoina mo le atina'eina o le vaega tumaoti fa'apea avanoa mo galuega;
- e) Ia fa'atūmauina i lalo ifo o le 50 pasene o le tamaoaiga le aofai o aitalafu ma nonogātupe a le Malo;
- i) Ia i le va o le 40 – 45 pasene o tupe fa'aalu se seleni e fa'aagaga mo totogi o tagata faigaluega, ina ia o gatasi ma le manulauti a le Malo ina ia si'itia le fa'atinoga o auunaga;
- o) Ia fa'atūmauina i lalo ifo 3.5 pasene o le tamaoaiga le fa'asiliga o tupe fa'alu nai lo'o tupe maua;
- u) Fa'aleleia galuega fa'atino a Fa'alapotopotoga a le Malo aua le famāmā avega i le Tala o le Tupe a le Malo, i nonogātupe lē totogiina;
- f) U'unaia le fa'aleleia o le aoina o tupe maua a le Malo.

I le fa'atūmauina o tulaga lelei aua se tamaoaiga mausalī, o lo'o fa'aaauaina pea le fausia e le Malo o faiga fa'avae mautu ma le talafeagai. O nei faiga fa'avae, o le a puipuaia mai ai le tamaoaiga mai a'afiaga e ono tutupu i le lumana'i, e pei o le fa'aletonu i tamaoaiga o le lalolagi, ina ia maua ai vaegatupe fa'asao e mafai ona fa'asoa atu i Vaega Ma'oti o lo'o ave iai le fa'amuumua. O le a mata'ituina foi e le Malo tulaga talafeagai e fa'aaluina ai tupe i vaega e toe maua mai ai fa'amanuiaina tau tupe mo le Malo ma fesoasoani ai mo le fa'atupulaia o avanoa mo galuega. O le a mata'ituina lelei foi ma u'una'ia le fa'aleleia atili o auunaga a Matāgaluega ma Fa'alapotopotoga uma a le Malo.

O le a u'una'ia pea le fa'aitiitia o tupe fa'aalu a le Malo fa'apea ma le fa'asoasoa lelei o tupe fa'aalu i vaega tāua. E le gata i lea ao le tulaga i le pasene o nonōgātupe i le tamaoaiga o le a fa'atumauiina ina ia ausia.

Faiga-fa'avae Tau Tupe

O le fetu'utu'una'iga i le fa'asaoina o tupe a le Malo o le a lagolago tele ai faiga fa'avae mo le fa'aitiitia o tului o tupe. O nei faiga fa'avae ua ogatasi ma le tulaga maualalo o le tau o le soifuaga ma auaunaga fa'apea ai ma le sologa lelei o le fa'atupula'ia o le tamaoaiga. E le gata i lenei tulaga, ua fa'apea foi ona fesoasoani e u'una'ia galuega e fa'atupula'ia ai le tamaoaiga fa'apea tupe fa'aagaga e gafataulima ai le tali atu i fa'aletonu mai tulaga i tamaoaiga o le lalolagi ma mala fa'alenua. E ui ina talafeagai le tulaga o le tau o fesuiaiga o tupe ma le tamaoaiga, o lo'o moomia pea le fa'amausalī o tupe fa'aagaga mo fefa'atauaiga i se tulaga lelei (i le va o le 4.0 – 6.0 masina mo oloa fa'atau mai), aemaise ai lava aafiaga o fa'alavelave fa'alenua e ono tutupu mai.

I fa'avae mautu o tulaga tau tupe, sa maitauina ai le lelei pea o fefa'atauaiga ma le si'itia ai o nonōgātupe a le Vaega o Pisinisi Tuma'oti mai faletupe e tusa ai ma le naunautuiga sa iai ina ia fa'afaigofie fa'avae tau tupe i le isi 3 tausaga i luma, ma ua tula'i mai ise tulaga mautu ia nonōgātupe a faletupe fa'apisinisi i lona aotelega mai le TF2017/18 i le TF2018/19 ua si'itia mai le tulaga maoa'e sa iai i le TF2016/17, e mafua mai lea i le iloiloga sa fa'atautaia ma iloa ai vaega e tataua ona fa'amamua e pei o le malupuipua o nei aitalafu ma ia fa'aitiitia lo latou aafiaga i le tu'ufa'atasiga atoa o nei aitalafu. O le aofaiga o nonōgātupe o lo'o fuafua foi e fa'atupulaia i le (TF2019/20 ma le aga'i i luma). Ona o le malosi o fefa'atauaiga i fafo, o lo'o fuafua ai le si'itia o le tulaga o tau-aofaiga o tupe i le TF2017/18, ae o lo'o iai le talitonuga o le a toe fa'aitiitia i le TF2018/19 ona o le a fa'amautu nonōgātupe i le tatou lotoifale fa'atasi ai ma le fa'amautuina o le paleni o aseta i le lotoifale a isi atunuu i se tulaga mautu.

E tusa ai ma vaega ua ta'ua, o le a galulue pea le Faletupe Tūtotonu o Samoa ina ia:

- i. fa'aaauu pea ona fa'afaigofie le fa'atautaiga o faiga fa'avae tau tupe ina ia mautinoa le māmā o tului i nonōgātupe ma aitalafu a faletupe;
- ii. tu'uina atu o fesoasoani i le fa'agaoiina o aseta tau tupe e lagolago ai Faletupe ma le fa'afoeina o a latou galuega faatino;
- iii. fa'aaauu pea ona fesoasoani i faletupe o loo nafa ma tupe fa'amomoli mai fafo, ma le vaega mulimuli;

- iv. fa'aauau pea ona u'una'ia ma fa'alauiloa tulaga lelei i le fa'agaoioina lelei o tupe ma fausia se alafua mo le fa'atautaiga o tupe e tusa ai ma le tulaga o lo'o iai manaoga a le tatou atunu'u.

IV. VA'AIGA I LE LUMANA'I I LE TAMAOAIGA MA TUPE FA'AALU A LE MALO

Tulaga i le Tamaoaiga o le Lalolagi

O lo'o fa'aalia mai i le lipoti o Aperila 2018 a le fa'alapotopotoga o Fa'aputugātupe Fa'a-va-o-Malo (IMF) le si'itia malosi o le tamaoaiga o le lalolagi i le lumana'i. O lea va'ava'ai mamao e afua mai i le aotelega o le tulaga i le tamaoaiga o Atunu'u malolosi, ma o le a fa'aauau pea i le tausaga nei ma le tausaga fou. O lo'o lipotia foi o le a fa'atūmauina le lelei o le tulaga i le tamaoaiga a atunu'u e lelei maketi mo fefa'ataua'iga ma atunu'u tau atia'e. E tusa ai ma tulaga e pei ona ta'ua, o lo'o fuafuaina le fa'atupula'ia o le tamaoaiga a le lalolagi e tusa ma le 3.9 pasene i le 2018 ma le 2019. O lenei si'itiaga, e mafua ona o le malosi o le fa'atupulaia i tamaoaiga o atunuu i le Atu-Europa, Iapani, Saina ma le Malo o Amerika. I le tolu tausaga o lumana'i o lo'o fuafuaina ai le pa'ū mai i le 3.7 pasene le fa'atupula'ia o le tamaoaiga o le lalolagi.

Mo le tulaga i tamaoaiga o tatou paaga masani mo fefa'ataua'iga e iai Ausetalia, Niu Sila ma Fiti, o lo'o maitauina e ono fa'atupula'ia e tusa ma le 3.1 pasene, 2.9 pasene ma le 3.5 pasene mo le isi tolu tausaga. O lea tulaga e talitonu o le a iai se a'afiaga lelei i le tulaga o a tatou fefa'ataua'iga mai latou.

Tulaga i le Tamaoaiga o Samoa

I le agai atu i le lumanai, e fa'aauau pea le tulaga mausalī o le tamaoaiga ma o loo fuafua e **ausia le 1.8 pasene i le TF2017/18** ona o a'afiaga o le tapunia o le Yazaki Samoa ia Aokuso 2017.

Peita'i o loo fuafua e oo atu i le **3.3 pasene le malosi o le tamaoaiga i le TF2018/19**. E mafua lea ona o le sao a kamupani o lo'o fa'aaogaina le fale sa i ai le Yazaki Samoa fa'apea galuega tetele e i ai aualasimā, le fa'alauteleina o aualatele ma le Malae Va'alele fa'atasi ai ma tapenaga mo le talimalō a Samoa i Taaloga o le Pasefika. E le gata i lea, ao le a'afiaga lelei o le Tui-Samoa Cable i le tulaga o feso'ota'iga ma si'itia ai le tulaga mo Pisinisi tuma'oti. O le a maua ai foi avanoa e si'itia ai auaunaga mo le Soifua Maloloina (e-Health) ma le tulaga i Aoaoga (e-Education) mo le atunuu.

I le **TF2019/20 e ono oo atu le tamaoaiga i le 3.7 pasene** ona o le faatupulaia o tagata tafafao maimoa mai faapea le sao o Taaloga a le Pasefika lea o le a talimalo

ai Samoa ia Iulai o le 2019. Ona toe pa'ū lea i le 3.5 pasene i le TF2020/21, o lenei tulaga o loo fa'aauau pea ona o le lagolago a le poloketi a le Apia Waterfront i tulaga tau tagata tafafao maimoa mai fafo.

Fuafuaga Alualu Mamao: Tupe Maua ma Tupe Fa'aalu

O lo'o fuafua e siitia le tulaga o **Tupe Maua** aga'i atu i le lumana'i i le isi tolu i le lima tausaga. O le a silasila le Malo i le u'una'ia le fa'atulagaina lelei o auala e fa'amalosia ai ma si'itia ai le aoina mai o tupe maua. Ao le tulaga o **Tupe Fa'aalu**, o lo'o iai le talitonuga o le a fa'aauauina pea i lona tau fa'atusatusa o lo'o iai i le taimi nei (remain constant in real terms) mo le aga'i atu i le isi tolu tausaga i le lumana'i.

O fa'ailoilo o taiala mo le tamaoaiga ma ona taunu'uga o lo'o taua atu i lalo (o lo'o fa'amatala atili atu i le Pusa 2):

- 1) O le fa'asiliga o tupe fa'aalu nai lo'o tupe maua o le a fa'atūmauina i le 3.5 pasene o le tamaoaiga i le TF2018/19 ma tausaga e tolu i le lumana'i. O le a fa'aauau pea le mata'itūina o le fa'aaogaina ma le pulea lelei o tupe fa'aalu ina ia si'itia le fa'atupulaia o le mausalī o le tamaoaiga;
- 2) O le isi vaega taua mo le mata'itūina ma le puleaina lelei o tupe o le fa'ataua le o le si'itiaga o le aoina o tupe maua. O le a mafai ona ausia lea tulaga i le fa'atinoina o alafua ua mae'a ona fa'ataatia mo le aoina mai o tupe maua, aemaise o le a fa'amalosia atili lea galuega pe a taunu'u mai le masini fa'ata-oloa (scanner);
- 3) O lo'o fuafuaina e fa'atūmauina le pasene o Aofaiga o tupe fa'aalu i le tamaoaiga, ia i lalo ifo o le tapula'a;
- 4) Ia faatūmauina le pasene o nonōgātupe a le Malo, ia i lalo ifo o le tapulaa e 50 pasene o le tamaoaiga ina ia lagolagoina le mataituina ma le puleaina lelei o tupe. E afua mai ona o le malosī o le galulue fa'atasi ma le mataituina o faiga fa'avae ua faataatia e le Malo e fesoasoani ai i le tuutiitia tupe mo le totoigiina o nonōgātupe.

Pusa 2: Fa'atulagaga o le Tamaoaiga TF2017/18 - TF2020/21

	Fa'ailoilo	2017/18	2018/19	2019/20	2020/21
Tamaoaiga Fa'atulagaina (% o suiga)	3.0%-4.0%	1.8	3.3	3.7	3.5

	Fa'ailoilo	2017/18	2018/19	2019/20	2020/21
Paleni o le Tala o le Tupe (% o le Tamaoaiga)	Ia lē silia ma le 3.5% o le Tamaoaiga se fa'asiliga o tupe fa'aalu i lo'o tupe maua	-3.5	-3.5	-3.4	-3.3
Tupe o Galuega fai (% o le Tamaoaiga)	35%-38%	23.7	21.6	21.2	22.1
Totogi o Tagata Faigaluega (5 o le aofaiga o tupe mo galuega fai)	40% - 45%	47.5	48.4	47.6	47.8
Pasene (%) o Nonōgātupe a le Malo i le tamaoaiga	Ia lalo ifo 50%	47.4	44.1	38.8	34.7
Pasene o aofaiga e totogi mo Nonōgātupe i le tamaoaiga (%)	2% - 3%	3.4	3.5	3.3	3.3
Tamaoaiga (\$pilionā tālā)		2.27	2.38	2.54	2.66

Fa'amatalaga: Matāgaluega o Tupe

1. O aitalafu o lo'o ta'ua e mai lea i nonōgātupe o lo'o iai fesoasoani ma fa'amāmā'avega ;
2. O totogi o tagata faigaluega fa'apea ma tupe i galuega fai o lo'o aumai lea i le vaega o lo'o tapenaina le tala o le tupe

V. FUAFUAGA ALUALU MAMAO AUA LE TU'UITIITIA O AITALAFU A LE MALO

O le pasene o nonōgātupe a le Malo i le tamaoaiga ua tula'i mai 49.1 pasene, o lo'o i lalo ifo o le fua fa'atatau e 50 pasene o le tamaoaiga i le TF2016/17. O lo'o atagia mai ai le lelei o le mata'itūina ma le puleaina lelei o tulaga tautupe ma le fa'ataua o tupe fa'aalu i vaega talafeagai ma le si'itia o le aoina mai o tupe maua mai le fa'amalosia o le usita'ia o aiaiga ua fa'ata'atia. I le va'aiga i le lumana'i mo le isi tolu tausaga, o le a fa'aauau pea le fa'ataua i alafua fa'ata'atia mo le mata'itūina lelei o tupe. E le gata i lea, a'o tupe fa'ameaalofa mai tatou pa'aga mai fafo o le a fa'aauau pea aua le fa'atinoina o atina'e tetele a le Malo e aofia ai, auala tetele, Uafu i Matautu, poloketi mo le fa'aleleia o le saogalemu o le vaitafe i Vaisigano fa'atasi ai ma le fausiaina o le auala simā.